

杜氏通典卷第二十五

職官七

諸卿上總論諸卿

太常卿丞奉禮郎主簿博士太祝
兩京郊社署

太樂署太卜鼓吹署太醫署
太公廟等署

光祿卿丞良醞署主簿太官署
珍羞署

衛尉卿丞守官署主簿武庫署
武器署
左右都候

宗正卿丞諸陵署主簿太廟署
崇玄署

太僕卿丞典牧署主簿乘黃署
諸牧監
典廐署

大理卿正司直丞評事監獄丞

諸卿少卿附



東京大學
東洋文化研究所所藏
漢籍善本全文影像資料庫

書名 杜氏通典二百卷 嘉靖十八年西樵方獻夫刊本
撰者 唐 杜佑 撰，明 王德益、吳鵬 同校
卷 卷首
內容分類 史-政書-歷代通制
索書號 貴重-17
編號 B3510400

[彩色首頁1](#)

[東洋文化研究所漢籍目錄](#) 編號: B3510400

[東洋文化研究所漢籍目錄所藏漢籍善本全文影像資料庫](#) 索書號: 貴重-17

[漢籍善本全文影像資料庫](#) 文本 [杜氏通典二百卷](#) 嘉靖十八年西樵方獻夫刊本

版權所有: [東京大學](#) [東洋文化研究所](#)

[使用上的注意事項](#)

所究研京東院學化文方東 第
No. 4008 冊

0 1 2 3 4 5 6 7 8 9 5

不 許 複 製

NOT TO BE REPRODUCED

東京大学東洋文化研究所

刻杜氏通典序

夫學何爲者也夫學以經世者也而理身爲本焉
古之學者合而一今之學者岐而二而文藝之學
不與焉三代以上道法無二明刑弼治即九德之
臯陶帥師升陬乃一德之伊尹故洪範九疇統於
皇極周官六典先以關雎故曰古之學者合而一
自夫六籍散闕道學不明相國宗功止於刀筆之
吏心齋自况終爲寂寞之儒故新法擬周官徒使
民受其弊空言講大學不知國淪於夷故曰今之
學者岐而二夫物有本末事有終始在識後先未
嘗偏廢雖然世降風殊厭煩喜約守身之儒或有



經世之學無聞治理日隳生民何賴則俊傑之士有憂焉予觀刻通典者之志其在斯歟通典作於唐杜岐公上自軒轅下訖天寶禮樂刑政識其大者事非經國皆所不錄貫穿經史類列始終要在可行匪資多識故名曰典岐公之學蓋主於經世者也厥後有鄭氏通志馬氏文獻通考雖益加詳實爲寡要曰志曰考是在博聞非其倫矣惜乎二書旣興斯典漸廢板鏤不傳僅存士大夫抄本流布弗廣學者無因而睹焉嘉靖戊戌侍御連江王君十竹來按吾廣首謀于提學秀水吳君默泉訪求善本爰加精校乃請于提督都憲候官蔡公華

洲嘉樂贊成遂付之梓匪惠吾廣將傳四方俾斯典久晦而復彰覽者稽言而知學是豈人爲蓋天會也予考岐公嘗節度嶺南有討平朱崖之功近者半洲十竹協忠殫謀綏定交趾厥功尤偉斯人斯志所謂曠百世而相感者歟

嘉靖十八年己亥夏四月之吉

賜進士光祿大夫柱國少保兼太子太保吏部尚書
武英殿大學士知

制誥

經筵

國史總裁官西樵病叟方獻夫撰

杜氏通典序

唐左補闕李翰撰

儒家者流博而寡要勞而少功何哉其患在於習之不精知之不明入而不得其門行而不由其道何以徵之夫五經群史之書大不過本天地設君臣明十倫五教之義陳政刑賞罰之柄述禮樂制度之統究治亂興亡之由立邦之道盡於此矣非此典者謂之無益世教則聖人不書學者不覽懼冗煩而無所從也先師宣尼祖述堯舜憲章文武七十子之徒宣明大義三代之道百世可師而諸子云云猥復制作由其門則其教已備反其道則其人可誅而學者以多

閱爲廣見以異端爲博聞是非紛然塞胸滿腹頹洞
茫昧而無條貫或舉其末而不知其本原其始而不
要其終高談有餘待問則泥雖驅馳百家日誦萬字
學彌廣而志彌惑聞愈多而識愈疑此所以勤苦而
難成殆非君子進德修業之意也今通典之作昭昭
乎其警學者之群迷歟以爲君子致用在乎經邦經
邦在乎立事立事在乎師古師古在乎隨時必參古
今之宜窮終始之要始可以度其古終可以行於今
問而辨之端如貫珠舉而行之審如中鵠夫然故施
於文學可爲通儒施於政事可建皇極故採五經群
史上自黃帝至于我唐天寶之末每事以類相從舉

其始終歷代沿革廢置及當時群士論議得失靡不
條載附之于事如人支脉散綴於體凡有八門勒成
二百卷號曰通典非聖人之書乖聖人微旨不取焉
惡煩雜也事非經國禮法程制亦所不錄棄無益也
若使學者得而觀之不出戶知天下未從政達人情
罕更事知時變爲功易而速爲學精而要其道甚直
而不徑其文甚詳而不煩推而通放而準語備而理
盡例明而事中舉而措之如指諸掌不假從師聚學
而區以別矣非聰明獨見之士孰能修之淮南元戎
之佐曰尚書主客郎京兆杜公君卿雅有遠度志於
邦典篤學好古生而知之以大曆之始實纂斯典累

年而成杜公亦自爲序引各冠篇首或前史有闕申
高見發明以示勸戒用存景行近代學士多有撰集
其最著者御覽藝文玉燭之類網羅古今博則博矣
然率多文章之事記問之學至於刊列百度緝熙王
猷至精至粹其道不雜比於通典非其倫也於戲今
之人賤近而貴遠昧微而睹著得之者甚鮮知之者
甚稀可爲長太息也翰嘗有斯志約乎舊史圖之不
早竟爲善述者所先故頗詳旨趣而爲之序庶將來
君子知吾道之不誣

通典序

唐京兆杜佑君卿撰

佑少嘗讀書而性且蒙固不達術數之藝不好章句
之學所纂通典實采群言徵諸人事將施有政夫理
道之先在乎行教化教化之本在乎足衣食易稱聚
人曰財洪範八政一曰食二曰貨管子曰倉廩實知
禮節衣食足知榮辱夫子曰既富而教斯之謂也夫
行教化在乎設職官設職官在乎審官才審官才在
乎精選舉制禮以端其俗立樂以和其心此先哲王
致治之大方也故設職官然後興禮樂焉教化隳然
後用刑罰焉列州郡俾分領焉置邊防遏戎狄焉是

以食貨爲之首

卷十二

選舉次之

卷六

職官又次之

卷二十

禮又次之

卷百

樂又次之

卷七

刑又次之

大刑用甲兵十卷其次五刑

州郡又次之

卷十四

邊防末之

卷十六

或覽之者庶知

篇第之旨也

本初纂錄止於天寶之末其有要須議論者亦便及以後之事

杜氏本傳

杜佑字君卿京兆萬年人父希望重然諾所交游皆一時俊傑爲安陵令都督宋慶禮表其異政坐小累去官開元中交河公主嫁突騎施詔希望爲和親判官信安郡王漪表署靈州別駕關內道度支判官自代州都督召還京師對邊事玄宗才之屬吐蕃攻勃律勃律乞歸右相李林甫方領隴西節度故拜希望鄯州都督復留後馳傳度隴破烏莽衆斬千餘級進拔新城振旅而還擢鴻臚卿於是置鎮西軍希望引師部分塞下吐蕃懼遺書求和希望報曰受和非臣下所得專虜悉衆爭檀泉

希望大小戰數十俘其大酋至莫門焚積畜卒城而還授二子官時軍屢興府庫虛寡希望居數歲芻粟金帛豐餘宦者牛仙童行邊或勸希望結其驩荅曰以貨藩身吾不忍仙童還奏希望不職下遷恒州刺史徙西河而仙童受諸將金事泄抵死畀金者皆得罪希望愛重文學門下所引如崔顥等皆名重當時佑以蔭補濟南參軍事剡縣丞嘗過潤州刺史韋元甫元甫以故人子待之不加禮他日元甫有疑獄不能決試訊佑佑爲辨處契要無不盡元甫竒之署司法參軍府徙浙西淮南皆表置幕府入爲工部郎中克江淮青苗使再遷容

管經畧使楊炎輔政歷金部郎中爲水陸轉運使改度支兼和糶使於是軍興餽漕佑得剽決以戶部侍郎判度支建中初河朔兵掣戰民困賦無所出佑以爲救敝莫若省用省用則省官乃上議曰漢光武建武中廢縣四百吏率十署一魏太和時分遣使者省吏員正始時并郡縣晉大元省官七百隋開皇廢郡五百貞觀初省冗官六百員設官之本以治衆庶故古者計人置吏不肯虛設自漢至唐因征戰艱難以省吏員誠救弊之切也昔咎繇作士今刑部尚書大理卿則二咎繇也垂作共工今工部尚書將作監則二垂也契

作司徒今司徒戶部尚書則二契也伯夷爲秩宗今禮部尚書禮儀使則二伯夷也伯益爲虞今虞部郎中都水使者則二伯益也伯冏爲太僕今太僕卿駕部郎中尚輦奉御閑廐使則四伯冏也古天子有六軍漢前後左右將軍四人今十二衛神策八軍九將軍六十員舊名不廢新資日加且漢置別駕隨刺史巡察猶今觀察使之有副也參軍者參其軍府事猶今節度判官也官名職務直遷易不同耳詎有事實哉誠宜斟酌繁省欲致治者先正名神龍中官紀蕩然有司大集選者既無闕員則置員外官二千

人自是以爲常當開元天寶中四方無虞編戶九百餘萬帑藏豐溢雖有浮費不足爲憂今黎苗凋瘵天下戶百三十萬陛下詔使者按比纔得三百萬比天寶三分之一就中浮寄又五之二出賦者已并而食之者如舊安可不革議者以天下尚有跋扈不服一省官吏被罷者皆徃託焉此常情之說類非至論其才者薦用不才者何患其亡又况顧姻戚家產哉建武時公孫述隗囂未滅太和正始大元時吳蜀鼎立開皇時陳尚割據皆羅取俊又猶不慮失人以資敵今田悅董繁刑暴賦惟軍是恤遇士人如奴固

無范睢業秦賈季強狄之患若以習久不可以
遽改且應權省別駕參軍司馬州縣額內官約
戶置尉當罷者有行義在所以聞不如狀舉者
當坐不爲人舉者任參常調亦何患哉如魏置
柱國當時宿德盛業者居之貴寵第一周隋間
授受已多國家以爲勲級纔得地三十頃耳又
開府儀同三司光祿大夫亦官名以其太多回
作階級隨時立制遇弊則變何必因循憚改作
耶議入不省盧杞當國惡之出爲蘇州刺史前
刺史母喪解佑母在辭不行改饒州俄遷嶺南
節度使佑爲開天衢疏析屢閉以息火災朱崖

黎氏三世保險不賓佑討平之召拜尚書右丞俄
出爲淮南節度使以母喪解詔不許徐州節度使
張建封卒亂軍立其子情請于朝帝不許乃詔佑
檢校尚書左僕射同中書門下平章事節度徐泗
討定之佑具舫艦遣將孟準度淮擊徐不克引還
佑於出師應變非所長因固境不敢進乃詔授情
徐州節度使析濠泗二州隸淮南初佑決雷陂以
廣灌溉斥海瀕棄地爲田積米至五十萬斛判營
三十區士馬整飭四鄰畏之然寬假僚佐故南宮
傅李亞鄭元均至爭權亂政帝爲佑斥去之十九
年拜檢校司空同中書門下平章事德宗崩詔攝

冢宰進檢校司徒兼度支鹽鐵使於是王叔文爲副佑旣以宰相不親事叔文遂專權後叔文以母喪還第佑有所按決郎中陳諫請須叔文佑曰使不可專耶乃出諫爲河中少尹叔文欲搖東宮冀佑爲助佑不應乃謀逐之未決而敗佑更薦李巽以自副憲宗在諒闇復攝冢宰盡讓度支鹽鐵於巽始度支費用度多署吏權攝百司繁而不綱佑以營繕還將作木炭歸司農練染還少府職務簡修明年拜司徒封岐國公党項陰導吐蕃爲亂諸將邀功請討之佑以爲無良邊臣有爲而叛卽上疏曰昔周宣中興獫狁爲害追之大原及境而止

不欲弊中國怒遠夷也秦恃兵力北拒匈奴西逐諸羌結怨階亂實生謫戒蓋聖王之治天下惟欲綏靜生人西至于流沙東漸于海在北與南止存聲教豈疲內而事外耶昔馮奉世矯詔斬莎車王傳首京師威震西域宣帝議加爵土蕭望之獨謂矯制違命雖有功不可爲法恐後奉使者爲國家生事夷狄比突厥默沒寇害中國開元初郝靈佺捕斬之自謂功莫與二宋璟慮邊臣由此邀功但授郎將而已由是訖開元之盛不復議邊中國遂安此成敗鑿戒之不遠也党項小蕃與中國雜處間者邊將侵刻利其善馬子女斂求繇役遂致叛

亡與北狄西戎相誘盜邊傳曰遠人不服則修文德以來之管仲有言國家無使勇猛者爲邊境此誠聖哲識微知著之畧也今戎醜方疆邊備未實誠宜慎擇良將使之完輯禁絕誅求示以信誠來則懲禦去則謹備彼當懷柔革其姦謀何必亟興師役坐取勞費哉帝嘉納之歲餘乞致仕不聽詔三五日一入中書平章政事佑每進見天子尊禮之官而不名後數年固乞骸骨帝不得已許之仍拜光祿大夫守太保致仕俾朝朔望遣中人錫予備厚元和七年卒年七十八冊贈太傅諡曰安簡佑資嗜學雖貴猶夜分讀書先是劉秩撫百家侔

周六官法爲政典三十五篇房琯稱才過劉向佑以爲未盡因廣其闕參益新禮爲二百篇自號通典奏之優詔嘉美儒者服其書約而詳爲人平易遜順與物不違忤人皆愛重之方漢胡廣然練達文采不及也朱坡樊川頗治亭觀林苑鑿山股泉與賓客置酒爲樂子弟皆奉朝請貴盛爲一時冠天性精於吏職爲治不暇察數幹計賦相民利病而上下之議者稱佑治行無缺云

右見唐書

名宦傳

杜佑字君卿京兆萬年人以忤盧杞遷嶺南節度

使開大衢疏析廛閭以息火災朱崖黎氏三世保
險不賓佑討平之召拜尚書右丞

右見嶺南志

杜氏通典卷第一

唐岐國公尚書右丞前鎮南節度使京兆杜佑君卿纂
明文林郎巡按廣東監察御史連江王德溢懋中校
奉議大夫廣東提督學校僉事秀水吳鵬萬里同校

食貨

一田制
二田制下水利田
三鄉黨土斷
版籍並附

四賦稅
五賦稅
六賦稅

七歷代盛衰戶口
八錢幣
九錢幣

十漕運
十一雜稅平準均輸
十二輕重

食貨一

田制上
後漢 周 秦 漢 後魏